

Dithero tsa Tirelano mo Kutlwanong

04/2016 Thero ka Sontaga wa 4 mo sebakeng sa Adfente, e le ka 20. 12. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Bafil. 4:4, le re: "Itumeleng mo Moreneng ka gale, ke a boela ka re, itumeleng!"

1. Sefela sa 46 - 44/46

2. **Thapelo:** Morena, Modimo, Rara yo o rategang wa legodimo, re a leboga, re lebogela bosupi jwa gago jo o bo ba rometseng, jo o sa ntseng o bo romela bone ba kajeno ba e leng basupi ba Morena wa rona Jesu, o ba abele ka metlha thata le bopelokgale gore e nne basupi ba gagwe ka bopelokgale, le ka boammaaruri, le ka nnete. Re ikopela le rona mmogo le bone gore o re abele ka metlha Mowa wa gago wa go fenya ka metlha ditimetso le ditsietso tsa ga Satane, re se timediwane ke ditsietso tsa ditshokamo, mme re itumele ka metlha mo Moreneng, re itumelele Lefoko la gagwe gore le gomotse le rona. Amen.

3. Lefoko la Testamente e kgologolo le kwadilwe mo go Jes. 52:7-10;
Epistolo ka fa thulaganyong ya 4 e kwadilwe mo go 2 Bakorinthe 1:18-22;
Efangele ka fa thulaganyong ya 1 e kwadilwe mo go Luka 1:39-56.

4. A go ipolelwe tumelo ya bokeresete!

5. Sefela sa 45 - 43/45

6. Thapelo ya mmadi wa thero.

7. **Epistolo** ka fa thulaganyong ya 2 e kwadilwe mo go mo go Bafilipi 4:4-7, e re: "Itumeleng mo Moreneng ka gale, ke a boela, ka re: Itumeleng! A bopelontle jwa lona bo itsiwe ke batho botlhe. Morena o gauhi. Se tshwenyegeleng sepe, mme a ka metlha tse lo di tlhokang di itsisiwe Modimo ka thapelo le kopo, di na le tebogo. Mme kagiso ya Modimo e e fetang tlhaloganyo yotlhe e tla boloka dipelo tsa lona le maikutlo a lona mo go Keresete Jesu." Amen.

8. **Thero:** Phuthego e e rategang mo Moreneng wa rona Jesu Keresete, Sontaga wa kajeno ke Sontaga wa bofelo mo sebakeng sa Adfente, ke Sontaga fa pele ga moletlo wa modumo o mogolo o o itumelelwang ke batho botlhe, e le moletlo wa go gopola botsalo jwa Morena wa rona Jesu Keresete, ka boitumelo jo bo farologanyeng le jwa ba bangwe ba

ba itumelelang go bonana le go ikhutsa le ba bangwe ba ba neng ba sa bonane ka sebaka se selelele, le go itumelela go abelana dikabelo tse dintle, le go ikhutsa sentle fela, mme rona badumedi, re itumelela go bona bopelotlhomogi jwa go tsalelwa ngwana wa legodimo, Morwa Modimo yo re setseng re mo tsaletswe kgale gore e nne motho ruri, a nne le rona, a nne gaufi le rona, e le Seganka se se tllileng mo lefatsheng go re golola mo boleong le mo losong, le mo matshwenyegong otlhe a a boitshegang. Ke ka moo epistola ya kajeno e re nayang kgomotso e kgolo e ntle, e e reng: **Itumeleng mo Moreneng ka gale!**

1. Gore bopelontle jwa rona bo itsiwe ke batho botlhe, re se tshwenyegele sepe;
2. Gonne Morena o gaufi.
3. Kagiso ya gagwe e boloka ditlhaloganyo tsa rona.

1. Itumeleng mo Moreneng ka gale gore **bopelontle jwa rona bo itsiwe ke batho botlhe, re se tshwenyegele sepe.** Botlhe, badumedi le ba ba sa dumeleng, ke se se bokete se se rewang ke epistola ya kajeno, le fa ba tshela sentle, le fa ba lwala, a ba se ka ba tshwenyegela sepe, bopelontle jwa bona bo itsiwe ke batho botlhe. Le fa o bolawa ke tlala, o itshoke, o utswediwa, o itshoke, o humanegile, o itshoke, o nyadiwa, o kgalwa, o itshoke, o itshoke gape, o nne bopelontle, o se tshwenyegele sepe! Ke ene yo o ntshimolotseng, a nkgala, go tla buiwa gore ke legatlapa. Nyaya, o se ka wa bua jalo, itshoke, o nne bopelontle, o se tshwenyegele sepe. A batho botlhe ba itse gore o modumedi, ga o fetoge, ga o fetole isimilo sa gago jaaka lobodu. Ga go diragale gantsi mo go ene yo o sa tlhokeng, mme le mo go ene, o se ka wa ikgodisa, o se ka wa senya tsa gago ka go abela fela, o se ititaye sefuba ka go batla tlotlo ya gago. O abele ka go didimala yo o go rutang, o se ikgodise mo godimo ga ba bangwe ka tsa gago, le fa go le molemo, le fa go le maswe, o itshoke jaaka Jobe wa bogologolo yo o buileng mo ditlalelong le mo matshwenyegong a gagwe a re: “A re ka amogela tse di molemo mo MORENENG, mme tse di botlhoko tsona re a di gana?” Ke kile ka bona mohumagadi mo phuthegong ya rona, o ne a kopana le matshwenyego a a neng a tshwana le a ga Jobe, a tlhokafalelwa ke monna ka kotsi ya go latlhelwa koo, go ise go fole matlhoko, ga latela, ga latela basimane ba le babedi ba gagwe ka kotsi ya memotorokara e e farologanyeng, yo mongwe ka sethuthuthu, yo mongwe a wa mo ntlong e e godimodimo, Ka ba le bane bao basimane, go ne go sa utlwiwe sepe, tse re di bonyeng mo go mme yole, ke go tlhomama thata mo tumelong, go feta mo nakong ya

pele. Kana e ne e le modumedi tota. Ke bolela kgang e, gonne ga a tlhole a le teng, le ene o tlhokafetse. Mme jaanong Lefoko le bitsa mo go rona gore re itumele mo Moreneng, re se tshwenyegele sepe, re nne bopelontle mo bathong botlhe. Ee, Lefoko le re:

2. Itumeleng mo Moreneng ka gale, **gonne o gaufi le rona!** Lefoko le re: Morena o gaufi le rona mo ditseleng tsotlhe le mo dinakong tsotlhe, go se nne mo ntlheng e le nngwe fela, o gaufi le rona ka dikarolo tsotlhe, le ka ditemana tsotlhe. Badumedi ba ntlha, bogolo baapostolo ba ne ba akanya thata, ba amogela tota gore Morena o gaufi, a bowe ka pele go tla go athola batshedi le baswi. Ee, go ntse jalo, o gaufi go bitsa modumedi mongwe le mongwe, le motho mongwe le mongwe, go kgaolwe matsatsi a gagwe, mme go se fele foo. Go ntse fela jaaka Jakobo 5:8 a bua, a re: "Nnang pelotelele, lo tiise dipelo tsa lona, ka go tla ga Morena go le gaufi," gongwe jaaka go kwadilwe mo go Bahebere 10:37 gore "go sa ntse go le sebakanyana se sekhutshwanyane, mme yo o tshwanetseng go tla, o tla tla, a sa diege." Ba tla bona Morwa Motho a tla mo marung, a na le thata e kgolo le kgalalelo. Morena a re: Mme e re tseo di simolola go diragala, lo inamologe, lo tsholetse ditlhogo, ka gonne kgololo ya lona e a atamela, puso ya kgalalelo ya Morena e a atamela. Fa Morena a tla, fa a tla bitsa modumedi, a mo tlose mo lefatsheng, a atamela mo go ene, o gaufi le ene. Gape rona badumedi ba kajeno, re gopola thata mo sebakeng sa Adfente go tla ga Morena mo nameng, le go tla mo dipelong tsa rona ka Lefoko. Jaaka a ne a tsalelwa kwa Bethlehema, a nne gaufi le batho, o atamela gape mo go rona go tsena mo dipelong tsa rona ka molaetsa o o molemo wa boitumelo jo bogolo, fa re tsaletswe Mopholosi, jaaka re tla gopola ka moletlo wa botsalo ka Labotlhano, ka di 25. Letsatsi leo le setse le atametse. A re e leteleng, re kope gore a tsene mo go rona sešwa, dipelo tsa rona di itumele thata, di leboge, ka pitso ya gagwe le tsholofetso ya Morena e sa ntse e tlhomame, e re: Morena o nna le rona. A solofetsa, a re: "Mme itseng, nna ke na le lona ka malatsi otlhe go ya bokhutlong jwa lefatshe!" A re opeleng, re re: "Imanuele, Haleluya!" O nne le rona, Morena! Kwa ntle ga gago ga re ka ke ra dira sepe, le e seng go tshela, le e seng go goroga mo felong gope, le e seng mo go Rraago. Ka moo o tle mo go rona, dikopo tsa rona a di itsiwe ke wena ka dithapelo, le dikopo, le ditebogo tsa rona. A Modimo o itse dikopo tsa rona? Gantsi o itse dingongorego tsa rona fela, le go akanya ka ga botlhoka tshego jwa rona, le go jewa ke meetlo ya rona. Ke tsona tse di diragalang gantsi, go kopa,

le go rapela, le go leboga ga go yo, go a tlhokega. Go ne go ntse fela jalo mo morafeng wa Iseraele. Ga tshwenya Modimo le moeteledipele wa ona, e bong Moše ka go ngongorega ka metlha. Le rona re ntse jalo, re re: Re bolawa ke tlala, ke komelelo, le ka ona, le ka jona bolwetse, le tlalelo e e rileng. Re dumedisanya ka tsona, re botsanya botshelo jwa rona jalo, re re: Re tsogile, mme sehuba, re tshela ka komelelo! Letsatsi le gaketse! Modimo ga o itse, ga re o bolelele, ga re o obamele, le e seng go o khubamela ka mangole, le e seng go kopa mo go ona. O batlelang Modimo, o kopang mo go ona? A ona o a rapelwa, gongwe o lebetswe ke wena? Nyaya, Modimo o abela botlhe, le bone ba ba sa o kopeng, le ba ba sa o lebogeng. Mono Modimo o rata go re tiisa, rona badumedi gore fa re amogela kabelo, re e amogele ka tebogo, re itse gore o utlwile kopo le thapelo ya rona. Kabelo e tswa mo go ona, re tlhomame mo tumelong. Ke sona se se tshwanetseng go diragala ka dikopo, le dithapelo, le ditebogo tsa rona gore re itse, re gopole gore dikabelo ga di itlhagise fela, mme di tswa mo go ona, gonne re kopile mo go ona.

3. Itumeleng mo Moreneng ka gale, gonne kagiso ya gagwe e e fetang tlhaloganyo yotlhe e boloka dipelo tsa rona, le maikutlo a rona mo go Keresete Jesu, mo go ene yo o neng a sa itse bolelo, a se na molato ope. Ke ene yo o tlleng go nna bolelo ka ntlha ya rona. Ke se se fetang tlhaloganyo ya motho wa lefatshe lotlhe. A re mo amogeleng ka kagiso, gonne re abelwa tseo ka go dumela tsholofetso ya gagwe, e seng ka go dumela tlhaloganyo ya rona. Go di tlhaloganya di tsa rona ka go dumela kagiso e re e abelwang ke ene, re a di direlwa, ka tsa rona ka go dumela mo go ene Jesu Keresete. A re itumeleng ka ngwana yo o gaufi le rona, yo re gopolang botsalo jwa gagwe ka moletlo o mogolo wa malatsi a. O rata go re fa kagiso, go fele poifo le selelo le letswalo ka ntlha ya bolelo, fa re atamela mo go ene ka pelo e e ikwatlhayang, e e hutsafalelang maleo. Mafufegelo, le ditlhowano, le dikilano, le go tlhokomologa ditlalelo tsa ba bangwe, re kgaogane le tse tsotlhe tseo, Morena o gaufi, o rata go tsena mo go rona ka moletlo wa go gopola botsalo jwa gagwe. A go diragale mo go rona rotlhe le ka 25. A re baakenyeng dipelo tsa rona, re tsamaye re itshotse sentle jaaka mo motshegareng, e seng mo medirong ya tlhapelo le ya botagwa, e seng mo marobalelong a boaka le mekgweng e e maswe, e seng mo kgannye le mo lefufeng; mme re apare Morena Jesu Keresete, re se tlamele mmele ka mokgwa o o ka tsosang dikeletso tse di bosula. A go se diragale mo go rona jaaka kwa Bethlehema kwa ba neng ba se na

bonno mo ntlong ya baeti, ba ne ba tshwanetse go latsa ngwana mo segopong sa dipitse teng. A Morena a fitlhele manno mo go mongwe le mongwe wa rona mo moletlong wa botsalo jwa gagwe monongwaga le ka malatsi otlhe, dipelo tsa rona di baakanngwe sentle, di siamisediwe go amogela Morena ka boitumelo jo bogolo. Amen.

9. Thapelo: Rara, re lebogela Lefoko la gago le le phepa. Re a kopa gore Mowa o o Boitshepo wa gago o re rute gore re bue, re re: Tla Jesu Morena wa rona, o itirele manno mo go rona gore re oketse tlotlo ya gago. Amen

Thapelo ya Morena: Rara wa rona yo o mo legodimong ...

10. Sefela sa 73 - 68/70

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke A. N. Ntuli, ka ngwaga wa 2003/2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.